



**Rotstab-Clique Liestal  
Junge Garde**

**Dr Horror-Trump – dr Trump, es ische Gruus, bringt sini Marionette ins wiise Huus.**

Dr Trump isch jetzt im wiise Huus  
und was er macht, das isch e Gruus:

Fraue wärde nid respektiert,  
nach em Amtsaatritt wird nur diskutiert,  
wie viel Lüt hei mit ihm gfyyrt.

Zuegriff uf e rote Chnopf,  
doch nur Erotik in sim Chopf  
und alli Moslem in ei Topf.

Vom Geld verwöhnt,  
Kritik nit gwöhnt,  
hauptsach sini Hoor guet gföhnt.

An Klimawandel glaubt er nid,  
aber Twitter isch dr Hit,  
öb das es glücklichs Ändi git?

Dä Medie kei Glaube schänke,  
für die Ryyche d'Stüre sänke,  
Amerika vo dr Welt abhänke.

Glooge wird an einer Tour,  
kompromisslos und au stuur,  
aber wenigschtens sitzt d'Frisur.

Alternativi Fakte verbreite,  
sich vom Gfühl im Buuch loh leite,  
uufzieh vo de herte Saite.

Amtskollege brüskiere,  
die eigni Meinig dure stiere,  
und eso Konflikt riskiere.

Dekret erloh,  
nüt verstoh,  
ruckwärts goh.

Muure boue,  
nit vertroue,  
numme nit d'Frisur versoue.

D'Menscherächt verletze,  
numme zum es Zeiche setzte,  
gege Minderheite hetze.

D'Wallstreet, wo er vertüfelt hett,  
isch guet verträte, in sim Kabinett,  
y weiss nit, was me do no säge sett.

Wenn das so wytter goht, jä das isch schlamm,  
wird d'USA zum Horror-Film.

Doch zum gseh, wie das chönnt ände,  
muesch di nid ind d'Zukunft sände:

Mir zeige dir, was wird passiere,  
wenn dr Populismus duet grassiere.

Chasch an eusne Larve gseh,

dr Trump isch Presidänt, dass duet eus weh.

Aber au am Donald sini Friise  
cha eus d'Fasnecht nit vermiese.

Mir schwinge d'Schlegel, drucke d'Klappe  
und pfiffe uf de amerikanisch Lappe.